

CARTA JEE CUAHAN NUU ÑAYUU HEBREO

Jeē ní tají Yaā Dios Sēhe ya
ni nacani ya jnūhun

1 Tijni jínu te tijni modo ni
cahān Yaā Dios jíin táca jíi
yō nde jenahán, chi ni tají yá tēe
ni canacani jnūhun ya. ²Te vijna
te tiempo cuándihí yāha ní tají yá
maá Séhe ya ni nacani ya jnūhun
nuū yō. Te jíin Séhe ya ni sáha ya
ñayīvi jíin táca gá, te ndivii jeē iyó
ní chihi ya ndaha Séhe ya. ³Te Sēhe
ya yōhyo luu cújéhnú ya, nájñūhun
luu cújéhnú maá yá. Te ndihí ndese
cúu maá yá, suni súcuan cúu Sēhe
ya. Te jíin poder jnūhun ni cahān
Sēhe ya te iyó cutú ndihí-ni. Te ni
sándoo ya yohó táca cuéchi yó, te
sáa te ni cucōo ya lado váha mesa
maá Yaā cújéhnú nde andiví.

Jeē cújéhnú ga Sēhe Yaā Dios
vēsú tācá ndajéhé yā

⁴Te ni ndujéhnú ndasí gá Sēhe
ya vēsú tācá ndajéhé andiví, chi
ni nihīn yā tahū jeē ndíso ya jniñū
jéhnú ndasí gá vēsú jniñū cándiso
ndajéhé. ⁵Chi súcuan ni cahān
Yaā Dios jíin Séhe ya, te nasūu jíin
ndajéhé yā:

Máá ró cúu Sēhe ri,

te vijna te ni sajhénu ri rohó jéē
cúu ri Tatá rō.

Te suni ni cahān yā jnūhun Séhe ya,
te nasūu jnūhun ndajéhé yā:

Máá rí cúu Tátá nuū Séhe ri,
te máá i cúu Sēhe nuū rī.

⁶Te suni ná ni tají yá Sēhe ya cújéhnú,
ni quiji ini ñayīvi yāha, te ni cahān yā:

Ndihí ndajéhé rī na chíñúhún i
Sēhe ri.

⁷Te ni cahān tucu ya jnūhun ndajéhé yā:

Nájñūhun quée tachī, súcuan
cájica ndajéhé rī sáha ri,
te tācá un jéē cájejníñū nuū rī,
nájñūhun yáñuhūn cácuu.

⁸Te jnūhun Sēhe ya chi sa suhva
cáhán yā:

Máá ró cúu Yaā Dios, te ndacu
ró jniñū níí cáni,
te jniñū ndácu ró, máni jniñū
ndaā cúu.

⁹Cúsī ni rō jíin jniñū váha, te
jíto uhū rō jniñū néé.

Jeē yúcuan ruhū, Yaā Dios maá
ró, ni sáha ri
jeē yóhyo ga cúsī ni rō vēsú
táca gá jeē iyó andiví.

¹⁰Te suni cáhán yā:

Máá ró cúu Jitoho, te nde xihna
ñúhún ni sáha ró jéē ni jécōo
ñayīví.

Te andiví chi suni jeē ni sáha ró cúu.

¹¹ Te tācá un chi naa, te máá ró chi ní cáni íyó ró.

Te tācá un chi cutúhú nájñuhun cutúhú ñin sahma,

¹² te nacaquin jnahnū rō te nasama ró jíjnáhan.

Te máá ró chi ma sáma cuiti rō, te quiví cótecu rō ma ndíhi cuiti.

¹³ Te súcuan ni cahān tucu yā jíin Séhe ya, te nasūu jíin ndajéhé yā:

Cucōo ró lado váha ri nuū kujéhnū ró,

te na sáha ri jeē quende rō

poder tāca jéē cájito uhū rohó.

Achí yá. ¹⁴ Te tācá ndajéhé yā chi mozo-ni cácuu, te tájí yá cuangoo jeē chindéé ñáhán ñáyuu jeē nihín tahū jeē jnama ya.

Jeē ma cúhuun ni yō jíin jnúhun jnáma ya yohó

2 Núu súcuan te cánuú jéē váha ga chuhun ni yō tāca jnúhun ya jeē ní cajini yó, chi núu tuú te sanaa te scuíta yó. ² Chi nde jenahán ní jejníñu ya ndajéhé yā ni cacastúhun jnúhun ya, te ni cajini ñayuu jeē iyó ndáá. Te ñayuu nihni ni jíin ñáyuu tu ní cájendetū jnúhun ún, vetū-ni ni canihín i castigo. ³ Te núu súcuan ni cuu, te yóhó, ¿ndese cācu yó núu ma chúhun ni yō jnúhun cánuú gá jeē jnáma ya yohó? Chi xihna gā maá Jítoho yō ni nacani ya jnúhun yáha, te sáá te tēe jeē ní cajini nahín ni canacani ndaā tucu máá de nuū yō. ⁴ Te Yaā Dios suni ni chindéé ñáhán yá de jeē ní canacani de jnúhun ya. Chi ni sáha ya jíin de jeē ní casáha de sñin sñin jniñu jéhnū jeē nahán

náā ni yō jíto yó poder yā. Te suni ni jēhe ya Espíritu Santo yā nuū ñin ñin yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jēhe ya jnúhun jeē condiso jníñu siquī ñayiví jéē quíji, chi sa suhva nuū Séhe ya Cristo ni jēhe ya. Te siquī ñayiví un cúu jeē cahán rí yāhá. ⁶ Chi suhva yósó núu tútu jeē ni cahán David jíin yá:

¿Na vé cúu ñayuu jeē ñúhun ni ní i?

Te ndíhví ni ni síquī i, te máá ñáyuu cúu i.

⁷ Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajehnū ní i te squéndōo yíñúhún ní i, te cani ní i jeē ndacu i jniñu nuū tāca jéē ni sáha ní.

⁸ Te ndíhi jeē iyó chi sáha ní jéē kujéhnū i siquī.

Achí tutu. Te jeē ni sáha Yaā Dios jeē kujéhnū i siquī ndíhi, núu súcuan te ma quéndōo ni ñin jeē ma cújéhnū i siquī. Te vēsú súcuan te vijna te ná tu coto yó jéē kujéhnū i siquī ndíhi jeē iyó. ⁹ Te jeē jiní yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhi yā jehē yō, te jeē yúcuan ní ndujéhnū luu tucu ya, te ndíhi cáhiyo yíñúhún núu yā. Chi jeē váha ni Yaā Dios jíin yó, jeē yúcuan ní jihí Jesús jehē yō.

¹⁰ Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andiví núu luu kujéhnū

i jíin yá. Te vāha níhín jníñu jeē ni jéhe ya jnūndóho nuū Jesús, chi jeē ní ndoho ya súcuan te cuu condeca vāha ya ñayuu ní jnama ya. ¹¹Chi Jesús jeē ni sándoo ya i te máá i jeē ní candundoo i, chi iin-ni Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vēsú ndasí núu i. ¹²Chi yósó núu tútu jeē ni cáhān yā jíin Tátá yā:

Cachi na jnúhun ní núu tācá hermano na,
te mēhñu núu cándutútú i cata ná ndese cújéhnú ní.

¹³Te suni cáhān yā nájñuhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jíin táca gá sēhe Yaā Dios jeē ni jéhe ya nuū rí.

Achí Jesús.

¹⁴Te nájñuhun cácacu ñayuu jeē cúu i yiquí cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhí i. ¹⁵Te ni cacu ya súcuan návāha cuu quenehen ya tāca ñáyuu chíji jñuhun jeē yuhú i cuu i. Chi ní vida i ndóho i sáha ún. ¹⁶Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácañíje jeē ní nduu yucūn Abraham. ¹⁷Jeē yúcuan ní jini ñúhún nduu ínuú yá jíin táca hermano yā, návāha cuu ya sutú cújéhnú jeē squícu vāha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. ¹⁸Chi suni máá yá ni ndoho ya jeē ní jito ndee jnūndóho ya, te

jeē yúcuan cuu chindéé ñáhán yá ñayuu jeē jito ndee jnūndóho i.

Cújéhnú ga Jesús vēsú Moisés

3 Hermano, ni cana Yaā Dios rohó, te cácuu ró ñáyuu ndoo máá yá. Núu súcuan te na nácani vāha ni rō siquí Cristo Jesús, Yaā cúu apóstol jeē ní tejníñu Yaā Dios, te suni cúu ya sutú cújéhnú siquí jnúhun cácañíje yó. ²Chi ni squícu vāha ya nuū Yaā Dios, Yaā ní tee jniñu un siquí yā, nájñuhun ni squícu vāha Moisés nuū ñáyuu jeē ni cáhān Yaā Dios jeē cácuu i ñayuu vehe ya. ³Chi cújéhnú ndasí gá Jesús vēsú Moisés, nájñuhun cújéhnú ndasí gá tēe sáha vehe nasūu máá vehe. ⁴Chi tācá vehe íyó tée ni sáha. Te máá Yaā Dios cúu jeē ni sáha tāca jéé iyó. ⁵Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castúhún de siquí tāca jnúhun jeē steén yā tiempo quíji. ⁶Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjñuhun ya nuū i. Te suni máá yó cácuu ñayuu vehe ya, te núu na cuñíni níhin yó jíin jnúhun cácañíje yó ndé quívi sándíhí, te núu cúsiñi ni yō jeē ñúhún ni yō tāca jéé vāha jeē coo.

Jñuhun jeē ndetātu ñáyuu Yaā Dios

⁷Núu súcuan te na chúhun ni yō jeē cahán Espíritu Santo nuū tútu ii:

Vijna te núu cuni sōho ró jéé cahán Yaā Dios,

⁸te ma cúnihni ni rō nájñuhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

⁹ Chi yūcuan ní casáha jíi rō jniñu jeē ni quitī ni rī, achí yá, vēsú ni cajito i tācá jniñu ni sáha ri uū xico cuiyā.

¹⁰ Jeē yūcuan ní quitī ni rī jíin ñáyuu tiempo un.

Te ni cahān rī jeē máni jeē castóo i ichi ndaā, chi tu cáconi i condiquin i jnūhun ri.

¹¹ Te jeē yūcuan ní quitī ni rī, te ni cahān teyí rí jeē ma quívicoo cuiti i nuū ndetātú i sáha ri.

Achí yá.

¹² Núu súcuan hermano, coto má conéé ánuá ni ñin ró jéé cáca yátá ró jeē tuá candíje ró Yaā Dios, Yaā técu. ¹³ Chi sa suhva tāca quívī na stíhví jnáhan ni rō, níni gá iyó tiempo, návāha ma cúnihni ni ni ñin ró te stáhú rōhó sáha ró cuéchi. ¹⁴ Te núu na cuñi nihin yó ndé quivī sándihni jíin jnūhun jeē ní quejéé yó jíin, yūcuán na te cuu yó jnáhan Cristo.

¹⁵ Chi cáhán tutu:

Vijna te núu cuni sōhó ró jéé cahán Yaā Dios,

te ma cúnihni ni rō nájnūhun ni cunihni ni ñayuu jenahán.

Achí. ¹⁶ ¿Te ndé-ni cúu ñayuu jeē ní jini jnūhun ya te ni cunihni ni? Suu ndihni ñayuu jeē ni scácu Moisés jeē ní quendacoo Egipto. ¹⁷ ¿Te ndé-ni cúu ñayuu jeē ní quitī ni yā nuū uū xico cuiyā? Suu ñayuu jeē ní casáha cuéchi, te ni cajihí i nuū ñúhun téhé. ¹⁸ ¿Te ndé-ni i cúu jeē ni cáhān teyí yá jeē ma quívicoo cuiti i nuū ndetātú i sáha ya? Suu

máa ñáyuu jeē tu ní cájendetū nuū yā. ¹⁹ Núu súcuan te jíni yō jeē tu ní cúu quívicoo i nuū ndetātú i, siquī jeē tu ní cácandíje i ya.

4 Te níni íyó gá jnūhun jeē ni jéjnūhun ya jeē quívicoo ñayuu nuū ndetātú i sáha ya, te na cónso iyó yó jéé ma stívi yó, návāha tú coo jíin sava ró jéé ma nihín rō quívī ró. ² Chi suni máa yó ni cajini sōho yó jnūhun jeē jnáma ya yohó, nájnūhun ñayuu jenahán un. Te nuū maá i tu ní jéjnūñu jnūhun ni cajini i ún, siquī jeē tu ní cácandíje i. ³ Te yóhó jéé cácandíje, máa yó cúu jeē quívicoo yó núu ndetātu yó. Te siquī ñáyuu tu cácandíje ni cahān yā suhva:

Jeē yūcuan ní quitī ni rī, te ni cahān teyí rí

jeē ma quívicoo cuiti i nuū ndetātú i sáha ri.

Te súcuan ni cahān yā vēsú je íyó túhva nuū ndetātú i nde ná ni jecōo ñayiví. ⁴ Chi súcuan yósó jnūhun nuū tútu ii siquī quivī uxá:

Ni sínu Yaā Dios tāca jéé ni sáha ya, te ni ndetātu yá quivī uxá.

⁵ Te suni nuū tútu un yósó tucu:

Ma quívicoo cuiti i nuū ndetātú i sáha ri.

Achí yá. ⁶ Núu súcuan te sava ñayuu chi quívicoo nahín i nuū ndetātú i. Te ñayuu jenahán jéé ní cajini jnūhun jeē jnáma ya i, tu ní quívicoo i siquī jeē tu ní cájendetū i nuū yā. ⁷ Jeē yūcuan ní jeni tucu ya inga quivī jeē quívicoo ñayuu, te quivī un cúu vijna. Chi ná ni yāha cuehē tiempo jeē ni cáhān yā jíin ñáyuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sōho ró jéē
 cahán yā,
 te ma cúnihni ni rō núu súcuan.
 Achí tutu. ⁸Te nde jenahán ní
 squívi Josué ñayuu Israel un ñuu
 nuū ndetátú i. Te tu ní cúu squívi
 de i nuū ndetātu ánuá i sáha
 ya. Chi núu súcuan te ma cahán
 gā Yaā Dios jíin táca ñáyuu jeē
 vijna cúu quívi jeē quívicoo i nuū
 ndetátú i. ⁹Núu súcuan te íyó túhva
 nahín iin nuū ndetātu ñáyuu Yaā
 Dios, nájñuhun ni ndetātu máá
 yá. ¹⁰Chi ñayuu jeē quívicoo nuū
 ndetátú i jíin yá, chi ndetátú i jeē
 ní casájniñu i, nájñuhun ni ndetátú
 Yaā Dios nuū jñíñu ni sáha máá yá.
¹¹Núu súcuan te na ndúcú ndéyí yó
 quívi yó núu ndetātu yó un, te ma
 sáha ni iin yó cuéchi jeē ma cándíje
 yó, nájñuhun ni casáha i nde saá.
¹²Chi jñuhun Yaā Dios ndíto técu
 te íyó poder. Chi cúu nájñuhun iin
 espada jeē xeén ndíndúú lado, chi
 nástúu cájí ndese íyó jéē níjnūníní yó
 jíin ánuá yō, nájñuhun sáha espada
 jeē jéhnde te nástúu nuū ñujnáhan
 yiquí jíin meque. Te jñuhun ya
 nástúu ndíhi ndese jéni ni yō jíin
 ndese cúní yō sáha yó. ¹³Te tu íyó
 ni iin jeē yísahí jeē tu jíiní máá Yaā
 jeē náquihin cuenta, chi ndíhi-ni
 jíiní vāha ya, te ndíhi-ni túu ndijin
 nuū yā.

Jesús cúu sutū cujéhnu ga

¹⁴Te cánevāha yó iin sutū cujéhnu
 ga, te je ni ndaa ya ni ndívi ya
 nuū iyó Yaā Dios. Te Jesús Sēhe
 Yaā Dios cúu ya. Jeē yúcuan na
 cuíñi nihin yó jíin jñuhun jeē ní
 candíje yó. ¹⁵Chi névāha yó iin
 sutū cujéhnu jeē jíto ndáhú yóhó

jeē tu fuerza yō squícu vāha yó. Chi
 nájñuhun ndóho yó jéē jíto ndee
 jexeén yohó, suni súcuan ni ndoho
 ya jeē ní jito ndee un yá, vésú tú
 cuítí cuéchi ya. ¹⁶Núu súcuan te ma
 yūhu yó, chi na quívi yó yuhu mesa
 yā, cúu jeē cacān tahú yō. Chi maní
 yā jíin yó, te cúndáhú ni yā yohó,
 te siquí jeē vāha ni yā te chíndéé
 ñáhán yá yohó táca jínu jeē jíni
 ñáhún yó.

5 Chi táca sūtū jeē ní cujéhnu
 jenahán, ni nacāji Yaā Dios
 de mēhñu ñáyuu, te ni jeni ya de
 jeē cuíñi de nuū yā jehē ñayuu, te
 socō de ndajñíñu jíin quití nuū yā
 jeē siquí cuéchi i. ²Te cuu cahán
 vitá de jíin ñáyuu tu jécūhun ni
 jíin ñáyuu castívi, chi máá de
 suni tú na fuerza ini de squícu
 vāha de. ³Jeē yúcuan cúu jeē suni
 cánuú sócō de quití nuū yā jeē siquí
 cuéchi máá de, nasūu máá-ni jeē
 siquí cuéchi ñayuu.

⁴Te ni iin tēe tu cúu sájéhnu de
 máá de jeē cuu de sutū cujéhnu, chi
 sa máá Yaā Dios cúu jeē nacāji ya
 de, nájñuhun ni nacāji ya Aarón
 nde jenahán. ⁵Te suni súcuan Cristo,
 tu ní sájéhnu ya máá yá jeē cuu ya
 sutū cujéhnu, chi sa Yaā Dios ni
 sáha, chi ni cahán yā jñuhun yáha:
 Máá ró cúu Sēhe ri,
 te vijna te ni sajéhnu ri rohó jéē
 cúu ri Tatá ró.

⁶Te suni cáhán tucu ya nuū tútu ii:
 Níí cáni cúu ró sūtū,
 nájñuhun sutū Melquisedec
 jenahán.

⁷Te Cristo, ná ni condee ya
 ñayívi, te ni jicān tahú yā, te nde
 ni ndahyū yā te ni ndahyū cohó
 yá. Te ni cahán ndahú yá jíin Yaā

Dios, Yaā jeē cúu jnama ya jeē ma cúu yā nuú. Te siquī jeē yíñúhún ní chiñúhún yá Yaā Dios, te ni chindéé ñájnáhan Yaā Dios jíin yá nuú jñúndóho ún. ⁸Chi vésú Sēhe Yaā Dios cúu ya, te ni jendetū yā ni ndoho ya ini ñayīví, te súcuan ni jini yā ndese cúu jñuhun jéndetū. ⁹Te ná ni cuu ni squícu ndíhi ya jeē ní jendetū yā, te ni cucutú jñuhun jeē jnáma ya tāca ñayuu jéndetū nuú yā, te cotecu i ní cání. ¹⁰Chi ni jeni Yaā Dios yā jeē cúu ya sutū cujéhnu nájnūhun sutū Melquisedec.

Siquī jeē ma cáca yátá i

¹¹Te íyó cuéhē jñuhun jeē castūhun rí siquī tāca jéē yáha. Te yíí cúu jeē jécūhun ni rō sáha ri, siquī jeē tu cáconi rō chuhun ni rō. ¹²Te je ni cunahán cácañdije ró, te jíni ñúhún jéē cúu ró tée stéén nuú. Te tuú chi sa cájini ñúhún tucu máá ró tée stéén nuú rō tāca jñuhun Yaā Dios jeē tú yíí cuítí. Chi sa ni canduu ró nájnūhun sūchi yíquín jéē jíni ñúhún caxin i, chi ná tu ije i caji i jeē ndáva. Súcuan cácuu ró chi ná tu ije ró jíin jñuhun yíí gá. ¹³Chi núu máni máá nájnūhun sūchi yíquín jéxin cácuu ró, núu súcuan te tu cúu jecūhun vāha ni rō jñuhun ndaā. ¹⁴Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jíin jéē neé.

6 Núu súcuan te na yáha yó núu tāca jñuhun Cristo jeē tú-ni yíí, te na quíhín yō nuú jñuhun yíí gá, návāha na íje vāha ni yō jíin jñuhun ya. Te ma ndejéé tucu yó jíin jñuhun jeē ni scuáha yó xíhna gā, suu jñuhun jeē nácani ni yō stóo

yo cuéchi yó jéē cúu yō sáha, jíin jéē candíje yó Yaā Dios, ²jíin siquī jeē jéndute, jíin siquī jeē soó ndaha xiní ñayuu, jíin siquī jeē nátecu ndíyi, jíin siquī jeē jnahnú ndetū ñayuu níí cání. ³Núu súcuan te na yáha yó núu tāca jéē yáha te quívi yó núu jñuhun yíí gá, te núu cuāha Yaā Dios jñuhun.

⁴Chi íyó ñayuu jeē jé ni jecūhun ni i, te je ni jini i tāca jéē jéhe Yaā Dios, te je ni quívi i nuú jñuhun stéén Espíritu Santo, ⁵te suni je ni jini i jñuhun vāha Yaā Dios jíin ndese coo poder yā tiempo quiji. ⁶Te ñayuu un núu caca yátá i, te ma cúu ga ndejéé jeé i jeē nácani ni i. Chi jeē cáca yátá i cúu nájnūhun jeē nácagni tucu i Sēhe Yaā Dios jicā cruz, te cájēhe i jñuhun canu yā cájito ñayuu. ⁷Te ñayuu chi cácuu i nájnūhun ñuhun jeē cúun vāha saū nuú te ndóyo vāha. Te núu cánecoo jeē vāha caji tēe cásájniñu, yūcuán na te cúsiñi ni Yaā Dios jíin. ⁸Te núu máni iñu yóquin jíin yucū sajnéñu cánecoo nuú, núu súcuan te tu jéjñíñu cuítí, te squéndōo iñi yā, te iñi quívi te cayū. Súcuan jnahnū ndetū ñayuu cájica yátá.

Jeē ñúhun ni yō tāca jéē vāha jeē coo

⁹Te máá ró jijnáhan ró hermano, vésú cácahān rī súcuan jíin ró, te cácuacāhnu ni rī jeē cácuu ró ñayuu cuiñi ñihin, chi ñayuu ni jnama ya cácuu ró. ¹⁰Te Yaā ndaā cúu Yaā Dios, te tu náā ni yā jñiñu cásáha ró. Chi siquī jeē cáhiyo maní rō jíin yá te ni cacundáhú ni rō hermano rō cácañdije, te ni cachindéé ñáhán ró i, te súcuan cásáha ró ndé vijn. ¹¹Te cáconi rī jeē niní súcuan sáha

ga ná ìin ná ìin ró ndé quivī sándihí, chi jeē sāha ró súcuan te nihīn rō ndihī jeē cáñuhun ni rō. ¹²Te cácuti rī jeē ma cúhuun ni rō, chi sa ndacu ró ñáyuu cácadñje jeē jíin paciencia cándetu i, te jeē yúcuan nihīn tahú i táca jéē ni jéjnūhun ya.

¹³Chi quivī jeē ni jéjnūhun Yaā Dios nuū Abraham, te ni ndacunehen ya maá yá jeē ni jéjnūhun téyí yá, chi tuá na inga ndacunehen ya jeē kujéhu ga vēsú maá yá jeē cuu testigo yā. ¹⁴Te ni cahān yā: Jendaá ndije jeē vāha ndasí sāha ri jíin ró, te sāha ri jeē nducuehē ndasí yúcūn rō, achí yá jíin Abraham. ¹⁵Te jíin paciencia ni condetu de, te súcuan te ni nihīn de jeē ní jejnūhun ya. ¹⁶Te núu cáhān teyí ñáyuu, te ndacunehen i síhvī ìin jeē kujéhu ga vēsú maá i. Te núu íyó ìin jnūhun jeē tu cácadñje jnāhan, te núu ìin tēe cáhān teyí de jíin síhvī Yaā Dios, yūcuán na te jécuiñī jeē cátejñāhan. ¹⁷Te suni súcuan Yaā Dios, chi ni jejnūhun téyí yá nuū ñáyuu jeē cuāha ya tahū i. Chi ni cuni yā jeē cucāhnu vāha ni i jeē ma nácani yátá ni yā siquī jeē ni jéjnūhun ya nuū i. ¹⁸Chi ma nácani yátá cuítī ni yā siquī jnūhun jeē ni cáhān yā uū jínu, ìin jeē ni jéjnūhun ya, te inga jeē ni cáhān teyí tucu ya siquī suni jnūhun ún. Chi tu stáhú cuítī yā. Te jeē yúcuan máá yó jeē ní tūhva yó yá, chi yōhyo íyó ndeyí ni yō, te cáñuhun teyí ni yō jeē squícu ya jeē ni cáhān yā. ¹⁹Te siquī jeē súcuan ñúhun ni yō, te suu sāha jeē quéndōo nihīn ánuá yō jíin jnúhun ya, te quéndōo ndaā ni yō, nájnūhun quéndōo nihīn

barco jeē jnī gancho yuū. Te sāha jeē cúu quivī yó andiví núu íf gā, nájnūhun cuarto ìi gā jeē ni íyo ichi yátá sahna ni ndita caa ini vehe ìi jenahán. ²⁰Te ini yūcuán chi xihna gā Jesús ni quivī, návāha nune ya ichi quívicoo yó. Te jeē yúcuan níí cáni cúu ya sutū kujéhu nájnūhun sutū Melquisedec.

Jeē cúu Jesús sutū nájnūhun Melquisedec

7 Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā kujéhu téyí. Te ni jejnahan de Abraham ná ni nandicó Abraham jeē ní cundeyí de ni cajejnāhan de jíin táca rey. Te ni jicān tahú de jehē Abraham. ²Te táca úxi ndajñīnu jeē ní quende Abraham nuū táca rey un, ni jēhe de ìin ìin siquī un núu Melquisedec. Te síhvī Melquisedec cuní cahān: rey jeē sāha jniñu ndaā. Te suni nání de rey Salem, te jnūhun Salem cuní cahān: jeē iyó ndeyí síí ni. Te jeē yúcuan suni nání de: rey jeē sāha jeē iyó ndeyí síí ni ñáyuu. ³Te tu cáhān tutu jnūhun tátá de ni náná de ni táca jíí de. Ni tu cáhān núu ni cacu de, ni núu ni jihí de. Chi cúu de nájnūhun Jesús, Sēhe Yaā Dios, chi níí cáni cúu de sutū.

⁴Te condēhe jíjnāhan ró náa jéhu ni cuu Melquisedec, chi jíí jéhu yó Abraham ni jēhe de ìin ìin siquī táca jéē uxí nuū de siquī táca jéē ní quende de nuū rey un. ⁵Te jíin yō jeē táca úxi ndajñīnu ni canihīn ñáyuu, ni cajēhe i ìin ìin siquī un ní caquihin tēe cácuu sutū yucūn Leví, nájnūhun cáhān ley Moisés. Te ni caquihin de nuū

ñáyuu cácuu jnáhan de, chi iin-ni yucūn Abraham cácuu de jíin i. ⁶Te Melquisedec nasūu yúcūn Leví cúu de, te vēsú súcuan te ni quihin de iin iin siquī tāca jēē uxí nuū Abraham. Te suni ni jicān tahú de jehē Abraham, vēsú cúu Abraham tēe jeē ni jéjnūhun ya nuū. ⁷Te jíin vāha yó jēē tēe cújéhnū ga cúu jeē jicān tahú jehē tēe núu ga. ⁸Te ñayīvi yáha chi tāca sūtū cáquihin de iin iin siquī tāca jēē uxí nuū ñáyuu, vēsú cácuu te tēe cájihī. Te Melquisedec suni ni quihin de, te máá de chi cáhán tutu ii jeē técu de. ⁹Te suni cuu cahān yō jeē Leví, tēe jeē ní quihin iin iin siquī tāca jēē uxí nuū ñáyuu, suni nájnūhun nuū maá de ni quihin Melquisedec iin iin siquī tāca jēē uxí. Chi jeē ni jéhe Abraham nuū Melquisedec, suu cúu nájnūhun jeē suni ni jéhe de jeē siquí Leví jíin ndīhi ga yucūn de jeē quíji. ¹⁰Chi yucūn Abraham cúu Leví, te vēsú ná tu cacu de quivī jeē ni jéjnahan Melquisedec Abraham, te nájnūhun jeē ni jéhe máá de cúu jeē ni jéhe Abraham.

¹¹Te yucūn Leví ni cane sūtū Aarón jíin tāca gá sūtū ní quijicoo. Te ni castéén de ley yā nuū ñáyuu Israel jenahán. Te núu ní cúu sáha de jeē quendōo ndaā ñayuu jíin ley un núu, te tuá cánúu jeē núcuinī inga clase sūtū lugar Aarón jíin yúcūn de. Te inga clase sūtū cúu Cristo jeē cúu ya nájnūhun sūtū Melquisedec. ¹²Te núu nucuinī inga clase sūtū, te suni cánúu sáma ley siquī yucūn de. ¹³Núu súcuan te ni sáma ley un, chi cáhán tutu ii jeē Jítoho yō Jesús cúu inga clase sūtū ún, te ni cacu ya chíji inga yucūn.

Te yucūn ní quiiji ya ún, tú ni iin ní cúu sūtū. ¹⁴Chi jíin vāha yó jēē chíji yucūn Judá ni cacu Jítoho yō. Te yucūn ún chi tu ní cáhán cuiti Moisés jeē cánecoo sūtū.

¹⁵Te cáji cúu jeē ní nucuinī Cristo jeē cúu ya inga clase sūtū nájnūhun sūtū Melquisedec. ¹⁶Te tu cúu ya sūtū jeē ní cacu chíji yucūn Leví nájnūhun cáhán ley jenahán. Chi cúu ya sūtū siquī jeē ndíso ya poder cotecu yā ní cáni te ma cúu cuiti yā. ¹⁷Chi súcuan ni cahān Yaā Dios jnūhun ya:

Ní cáni cúu ró sūtū,
nájnūhun sūtū Melquisedec.

¹⁸Núu súcuan te jniñu jeē ní ndacu ley jenahán siquī sūtū, chi ni naa vijna, chi tu ní níhín jniñu quendōo ní cáni. ¹⁹Chi ley Moisés tu ní sáha jeē quendōo ndaā ñayuu. Te ni nihīn yō iin jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰Te jíin jēē ni cáhán teyí Yaā Dios te cúu Jesús sūtū. ²¹Chi tāca gá tēe ún, nasūu jíin jnūhun jeē ni cáhán teyí yá ní cúu de sūtū. Te Jesús chi ni cahān teyí Yaā Dios jeē cuu ya sūtū, chi súcuan cáhán tutu:
Ni cahān teyí máá Jítoho yō Yaā Dios, te ma nácani yátá ni yā:
Ní cáni cúu ró sūtū,
nájnūhun sūtū Melquisedec.

Achí yá. ²²Núu súcuan te jíin Jesús ni cucutú iin contrato vāha ga vēsú ley jenahán. ²³Te tāca gá sūtū ún, chi ni iyo cuehē de, chi siquī jeē cájihī de te tu ní cúu cuiñi de ní cáni. ²⁴Te Jesús chi cúu ya sūtū jeē cuiñi ní cáni, chi técu yā ní cáni. ²⁵Jeē yúcuan ndíso jniñu ya jnama

ya ñayuu quíjicoo nuū Yaā Dios, cotechu i nń cání. Chi nń cání técu yā te cáhán yā jehē i jíin Yaā Dios.

²⁶Núu súcuan te vāha ndasí sutū cujéhnū cúu Jesús, jeē nájñūhun jíini ñúhún yó. Chi sutū ií cúu ya, te tú na cuēchi ya, te íyó ndoo ya, te tu cúu ya jnánhan ñayuu casáha cuēchi, te cújéhnū téyí yá nde nuū sucún gá andíví. ²⁷Te máá yá tu jíini ñúhún sáha ya nájñūhun ni casáha sutū cácujehnū jenahán, jeē ndiquiví ni casocō de quití siquī cuēchi máá de xihna gā, te sáá te siquī cuēchi ñayuu. Chi iin jíinu-ni ni socō yā maá yá jehē yō, te ni cuu-ni. ²⁸Chi ni jeni ley Moisés tāca sūtū cujéhnū jeē tú na fuerza squícu vāha. Yūcuán na te cuéé gá te ni cahán teyí Yaā Dios. Te jíin jéē ni cahán teyí yá, te ni jeni ya Sēhe ya jeē cúu ya sutū cujéhnū, te sutū ndaā sutū vāha cúu ya nń cání.

**Jeē ndíso jníñu Cristo
siquī iin contrato jeé**

8 Núu súcuan te jñūhun cánuú gá jeē jé ni cahán rī cúu yāhā: Névāha yó iin sutū cujéhnū nájñūhun ni cahán rī, te ndéé yá lado vāha mesa nuū ndácu jniñū máá Yaā cujéhnū nde andíví. ²Te vijna te cúu ya sutū nde andíví, jeē cúu ndije lugar ií jeē ni sáha máá Jítóho yō Yaā Dios, nasū ñáyuu. Chi tu cáa nájñūhun vehe ií jenahán jeē ní casáha ñayuu. ³Te tāca sūtū cujéhnū ni jeconaā de jeē socō de ndajníñu jíin quití nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. ⁴Te núu ní íyo ga yā ini ñayíví, te ni ma quijnáhan jeē cúu ya sutū

jíin táca gá sutū, chi níní cásocō gā de quití nájñūhun cáhán ley Moisés. ⁵Te jniñu cásáha de, tu quijnáhan jíin jéē iyó andíví. Chi cúu iin muestra-ni jeē steén siquī andíví. Te cúu nájñūhun jeē ni cáhán Yaā Dios jíin Moisés quiví ní quejéé de sáha de vehe ií jenahán: Coto vāha ró jéé sáha ró táca ndajníñu nájñūhun jito jeē ni stéén rī nuū rō nde xiní yúcu, áhí Yaā Dios jíin de. ⁶Te vijna te sáha Cristo jniñu jéhnū ndasí gá vésú jeē casáha tāca sūtū ún, chi ndíso jniñu ya siquī contrato jeé jéé yóhyo vāha ga, chi ndíso jñūhun jéhnū ga jeē ni jéjñūhun Yaā Dios.

⁷Chi contrato ley xihna ñúhún, núu jeē ni sáha jeē queé vāha jniñu núu, te tuá cánuú jéé cóo contrato uū. ⁸Chi ñayuu jenahán un jéé tu ní cáquendōo ndaā, suhva ni cahán Yaā Dios jíin i, áhí tutu:

Quiji quiví jeē nasáha ri iin contrato jeé

jíin ñáyuu Israel jíin ñáyuu Judá, áhí Jítóho yō Yaā Dios.

⁹Te ma cóo nájñūhun contrato jeē ni sáha ri jíin jíi i jenahán, quiví jeē ní jniñi ri ndaha de jíjñáhan de, te ni quenehen ri de ini nación Egipto.

Chi tu ní cásquícu vāha de jíin contrato ley rī.

Jeē yúcuán tuá ni táñúhún rí de, áhí Yaā Dios.

¹⁰Núu súcuan te suhva coo contrato jeē nasáha ri jíin ñáyuu Israel, nde na quíji quiví yúcuán, áhí Jítóho yō Yaā Dios: Sáha ri jeé jécūhun ley rī nuū jeē níjnúní i,

te suni ini anuá i tee ri jnūhun
ley rī.

Te cuu ri Yaā Dios maá i,
te máá i cuu ñayuu maá rí.

¹¹ Te tuá jíni ñúhún steén i nuū
jnáhan i nuū ñáni i,
návāha cuni i ndese Yaā cúu
Jitoho i.

Chi ndíhi i cuni ndese Yaā cúu
rī,

nde ñayuu núu ga jíin ndé
ñayuu cujéhu ga.

¹² Chi cone cáhnu ni rī nuū i jeē ní
casáha i jniñu néé,
te ni ma núcūhun ga ni rī
cuéchi ni casáha i.

Achí Yaā Dios. ¹³Te jeē ni cáhān yā
jeē cuáha ya ñin contrato jeé cúu
jeē ní cachi yā jeē tuá cuajníñu
contrato xihna ñúhún. Te ñin jeē ní
cutúhú jéé tuá jejníñu, chi jíni yō
jeē je yajni naa.

**Vehe ñi ñayivi yáha ní
steén ndese cáa andiví**

9 Te ndaā chi contrato xihna
ñúhún ní ndacu jniñu ndese
chiñúhún i ya, jíin ndese coo ñin
vehe ñi ini ñayivi yáha. ²Te ni
cuvāha vehe ñi ún, te ni iyo uū
cuarto. Te cuarto xihna ñúhún jéé
naní cuarto ñi, ni ñin candelero oro
jíin mesa oro jíin pan ñi. ³Te ni iyo
sahma jeē ndíta caa jeē ndihyú inga
cuarto jeē naní cuarto ñi ndasí gá.
⁴Te ini un ní iyo ñin altar oro nuū
cayú sūje cútú, jíin yéjnu jeē ñúhun
contrato ley, te máni oro cúu níí
síquī yejnu. Te ini yejnu un íne ñin
tijehēn oro jeē ñúhun maná jeē ní
cuun andiví. Te suni íne vara Aarón
jeē ní nane numa, jíin tabla yuū jeē
yosó jnúhun contrato ley. ⁵Te síquī

yejnu un ní cahiin ndindúú figura
ndajéhé querubín jeē steén jeē íne
Yaā Dios. Te ni sáha cuandahū síquī
tapa yejnu nuū ni cóso yuyú níñi
jeē ndáhva cuéchi. Te tu núne yó
cáhān gā yō síquī tāca yúcuan vijna.

⁶Te ná ni jínu tācá un, te núu-ni
núu-ni quívicoo sutū ini cuarto
xihna ñúhún jéé casáha de jniñu
jeē cúu de sutū. ⁷Te ini cuarto uū,
chi tu cúu quívicoo na-ni sutū jíin
inga ñayuu, chi máñúhún-ni sutū
cujéhu ga cúu jeē quívi, te suni
ñin-ni vuelta jeē cuiyá. Te suni
ma cúu quívi de núu tú níñi quiti
jeē socó de nuū Yaā Dios jeē síquī
cuéchi máá de jíin síquī cuéchi
ñayuu. ⁸Te jíin yúcuan steén
Espíritu Santo nuū yō jeē ná ni iyo
ga cuarto ñi xihna ñúhún ini ñayivi,
te tu ní núne ichi jeē quívi ñayuu
ini lugar ñi ndasí jeē cúu andiví.

⁹Chi tāca yúcuan cúu jeē ni steén
ndese cúu tiempo vijna. Chi jeē
ní casocō i ndajniñu jíin quiti nuū
Yaā Dios, chi tu ní cúu cuiti sáha
jeē quéndōo ndoo ánuá ñayuu ní
casocō ún. ¹⁰Chi tācá un ní steén
máni síquī yiqui cúñu yō, ndese caji
yō, ndese coho yó, ndese ndundoo
yó. Te ni jejniñu máá-ni nde ni quiji
Cristo jíin ñin modo vāha ga.

¹¹Chi vijna je ni quiji Cristo, te
cúu ya sutū cujéhu ga jeē ndíso
jniñu ya síquī tāca jéé vāha jeē ní
quiji vijna. Te cúu ya sutū ini lugar
ñi nde andiví jéé cujéhu ga te vāha
ga vésú cuarto ñi jenahán. Te nasūu
jéé ní casáha ñayuu cúu, chi nasūu
cuenta ñayivi yáha cúu. ¹²Te jeē ni
quívi ya ini lugar ñi ndasí gá nde
andiví, te nasūu jíin níñi ndixúhú
ni níñi becerro, chi jíin níñi máá

yá ni quívi ya, ni socō yā ñin jínu-ni jeē níf cáni. Te súcuan ni jnama ya yohó jeē cótecu yō níf cáni. ¹³Chi nde jenahán te niñī stíquī jíin níñī ndixúhú jíin yāa becerro jeē ni cáyū nuū altar, ni cacosō yuyú de siquī ñáyuu jeē tu íyó ndoo ánuá i, te súcuan ni ndundoo i nuū yā. ¹⁴Te núu ni nihīn jníñu niñī tǎcá quítī ún, te nagā ni cuu niñī maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espírítu jeē iyó níf cáni. Te niñī yā nácate ánuá yō nuū jníñu néé jeē cúu yō sáha. Te súcuan te cuu cuajníñu yó núu Yaā Dios, Yaā técu. ¹⁵Jeē yúcuan cúu jeē ndíso jníñu ya siquī ñin contrato jeé. Chi ní jihī yā, te súcuan ni quende yā cuēchi ni casáha ñayuu ná ni iyó i chíji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo níf cáni, nájñuhun ni jejnūhun ya. ¹⁶Chi cúu nájñuhun núu sáha ñin tēe acta jeē cahán siquī tahū, te nde na cúu de te níhín jníñu. ¹⁷Chi núu técu gā tēe ni sáha, te tu níhín jníñu. Te nde núu ni jihī de, te sáa te jéjníñu. ¹⁸Te suni súcuan contrato xīhna ñúhún, suni ni jini ñúhún cucutú jíin níñī quítī níf jíhī. Te contrato jeé chi ni cucutú jíin níñī Cristo jeē ni jíhī yā. ¹⁹Chi ná ni cuu ni cachi Moisés tǎcá jniñu ndácu contrato ley un núu ndívii ñayuu, te ni quihin de niñī becerro jíin níñī ndixúhú jíin ndute, te jíin íxi cácuéhé jíin yúcū hisopo ni cosō yuyú de siquī libro ley jíin síquī ndívii ñayuu. ²⁰Te ni cahán de: Yāha cúu niñī jeē cúcutú contrato ley jeē níf sáha Yaā Dios

jíin yó, achí de. ²¹Te suni niñī un ní cosō yuyú de nde maá vehe ñi jíin táca ndajníñu ni cajejníñu de jeē cáchiñúhún de ya. ²²Te je yajni ndíhi ndajníñu, chí cáhán ley un jeē jíini ñúhún ndundoo jíin níñī. Te núu ma cáti niñī te ma cóne cáhnu ni yā nuū cuéchi núu.

**Jeē ni sócō Cristo maá yá
jeē quénde yā cuēchi**

²³Núu súcuan te tǎcá ndajníñu un jéé cácuu muestra tǎca jéé iyó andíví, ni jini ñúhún ndundoo jíin níñī quítī. Te tǎca máa jéé iyó andíví, chí ni jini ñúhún ndundoo jíin níñī Cristo jeē yóhoyo vāha ga. ²⁴Te Cristo chí tu ní quívi ya ini lugar ñi jeē ní casáha ñayuu, chí ñin muestra-ni ni cuu un jéé steén ndese íyó lugar ñi ndije nde andíví. Chi máa andíví ní quívi ya, te vijna íne ya nuū Yaā Dios jeē cahán yā jehē yō. ²⁵Te máa sūtū cujéhnu ga quívi de tǎca cuíyā ini cuarto ñi gā jeē socó de niñī quítī. Te Cristo tu ní sócō yā maá yá cuehē jíinu, chí ñin jínu-ni. ²⁶Chi núu jeē súcuan te cánuú jéé cuehē jíinu ndoho ya nde ná ni jecōo ñayíví te nde vijna núu. Te tuú chí sa tiempo cuándíhi yāhá ni quenda ndijin yā ñin jínu-ni jeē níf cáni, ni socō yā maá yá jeē ní quende yā cuēchi. ²⁷Te nájñuhun ni cundaā jeé cúu tǎca ñáyuu ñin jínu-ni, yūcuán na te sándaā Yaā Dios jniñu i, ²⁸suni súcuan Cristo ni jihī yā ñin jínu-ni jeē ni sócō yā maá yá jeē ní quende yā cuēchi cuehē ñayuu. Yūcuán na te ndiji ya ñinga jíinu, te nasūu jéé socó tucu ya maá yá jeē quénde yā cuēchi, chí sa suhva jeē jnáma ya ñayuu jeé cándetu i jeé ndíji ya.

10 Chi ley Moisés ni cuu iin muestra-ni tāca jéē váha jeē ní quiji jíin Cristo, iin jeē steén-ni ndese coo máá jéē váha. Jeē yúcuán tu cúu cuítì sáha ley un jéé quéndōo ndaā ñayuu jeē quíjicoo i nuū Yaā Dios jeē cásocō i quítì nuū cuiyá nuū cuiyá. ²Chi núu ní cúu sáha ley un jéé quéndōo ndaā i, te jecuiñī jeē cásocō i quítì núú. Chi núu ní cúu, te iin jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú. ³Te tuú chi jeē cásocō i quítì ún táca cuíyā, sa sáha jeē núcūhun ni i cuēchi i. ⁴Chi niñī stíquī jíin níñī ndixúhú, ma cúu cuítì quende cuēchi.

⁵Jeē yúcuán ná ni quiji Cristo ini ñayíví, te ni cahān yā jíin Yaā Dios: Jeē jéhu i quítì jíin jéé jéhe i ofrenda nuū ní, chi tu ní núnjahan ni ní.

Te ni sātūhva ní yiqui cúñu maá ná jeē socó na.

⁶Te tu ní cúsiñi ni ni jéé jéhu i quítì te sócō i ti jeē ndúndoo cuēchi i núú.

⁷Yūcuán na te ni cahān ná: Yáha véji ná jéé squícu ná jniñu jeē núnjahan ni ní, Tátā Yaā Dios. Chi súcuán je yósó jnúhun na núu tútu.

Achí Jesús. ⁸Xihna gā ni cahān yā jeē tu ní núnjahan ni Yaā Dios te tu ní cúsiñi ni yā jeē jéhu i quítì te jéhe i ofrenda, jíin jéé jéhu i ti te sócō i ti jeē ndúndoo cuēchi i núú, nájñūhun ndácu ley jenahán jniñu.

⁹Te ni cahān gā yā: Yáha véji ná jéé squícu ná jniñu jeē núnjahan ni ní, Tátā Yaā Dios. Te jeē ni cahān yā súcuán, te ni sáha ya jeē jecuiñī jeē

cásocō i quítì, chi ni socō yā maá yá. ¹⁰Te ni sáha Yaā Dios jeē iyó ndoo iyó lí yō nuū yā siquī jeē ni sáha Jesucristo jeē núnjahan ni Yaā Dios, suu jeē ni sócō yā yiqui cúñu yā iin jínu-ni jeē níí cáni.

¹¹Te tāca sūtū ún ndíquivī ni cahiin de ni cajejníñu de nuū yā, te cuehē jínu cájehni de suu quítì jeē socó socó de. Te tācá un chi ma cúu cuítì quende cuēchi. ¹²Te Cristo chi iin jínu-ni jeē níí cáni ni socō yā maá yá jeē siquī cuēchi yó. Te sáa te ni cucōo ya lado váha Yaā Dios nuū cujéhu ya. ¹³Te yúcuán ndétu ya vijna nde quiji quivī jeē quénde yā poder tāca jéé jíto uhū nuū yā. ¹⁴Chi jeē ni sócō yā maá yá iin jínu-ni, te ni sáha ya jeē níí cáni quendōo ndaā ñayuu ni sándoo ya.

¹⁵Te máá Espiritu Santo suni cáji cáhán yā siquī jnúhun yáha, chi xihna gā cahán yā:

¹⁶Suhva coo contrato jeē nasáha ri jíin i, nde na quíji quivī yúcuán, áchí Jítoho yō Yaā Dios: Sáha ri jeē jécūhun ley rī ini anuá i, te suni nuū jeē níjnūní i tee ri jnúhun ley rī.

¹⁷Yūcuán na te cáhán gā yā: Ma núcūhun cuítì gā ni rī tāca cuēchi jíin jniñu néé ní casáha i. Achí yá. ¹⁸Núu súcuán te núu je ni ine cáhnu ni yā nuū cuēchi yó, te tuá cánuú jéé socó gā yō jeē siquī cuēchi yó.

**Jeē ní nune ichi quívi
yó núu Yaā Dios**

¹⁹Jeē yúcuán hermano, ma iin jeē cáni ni yō, chi cuu quivī yó lugar

ii ndasí ndé nuū iyó Yaā Dios, siquī jeē ní jeti niñī Jesucristo. ²⁰Chi ni nune ya ñin ichi jée jée cótecu yō níf cáni sáha ya. Chi ná ni jihī yā te ni tahndē sahma ndíta caa jeē ndihyú lugar ii ndasí gá ini vehe ii. Te súcuan ni steén Yaā Dios jeē núne quívi yó lugar ii ndasí gá nuū iyó yá. ²¹Te Jesús cúu sutū cujéhnu ndasí jeē ndíto yóhó ñayuu cácuu sēhe Yaā Dios. ²²Núu súcuan te na quívicoo yó núu Yaā Dios, te na cóo ndije ndaā anuá yō, te na cándíje nihin yó jée iyó ndáa ndihī jnūhun ya. Chi jíin niñī Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jíin ndute. ²³Te na cuñī nihin yó jíin jnūhun jeē cácahān yō jeē ñūhun ni yō jeē sáha ya jeē váha jíin yó. Te ma cáca yátá yó, chi vāha squícu máa Yaā Dios jeē ní jéjnūhun ya nuū yō. ²⁴Te na nácani ni yō ndese stíhvī jnáhan ni yō jeē cundáhú gá ni yō jnáhan yó, jíin jée sáha yó jniñu váha. ²⁵Te níni na ndútútú yó chiñúhún yó yā, te ma cúhuun ni yō nájnūhun casáha sava i, chi sa víhyá gā na stíhvī jnáhan ni yō, chi je cájini yō jeē cuácuyajni quívī ndíji ya.

²⁶Te núu je ni jecūhun ni yō te ni jetáhú yó jnūhun ndaā, te núu máni sáha sáha-ni yó cuéchi, núu súcuan te tuá na inga iyó jée cúu siquī cuéchi yó. ²⁷Chi sa quéndōo máni ga jnūhun xeēn siquī yō jeē quiji quívī juicio te quiji yáñuhūn xeēn jeē cayū ñayuu jeē cájito uhū i ya. ²⁸Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnūhun cúndáhú ni iyó. ²⁹Te

nagā ni cuu jeē ma ndóho xeēn gā ñayuu jeē squéhichī i máa Séhe Yaā Dios, chi nájnūhun jeē jeñú níhnu i siquī yā. Te sáha i jeē tu ndé jéjníñu niñī yā jeē ní jeti siquī contrato jeē ndúndoo i nuū yā nuú. Te súcuan sáha ndevāha i nuū máa Espíritu Yaā Dios jeē sáha jeē váha yóhó. ³⁰Chi je jíin yō jeē ni cáhān máa yá: Máa rí sáha jeē ndutahū i siquī cuéchi i, máa rí cuāha castigo i, áchí Jítoho yō. Te suni cáhān: Máa Jítoho yō sándaā yā siquī cuéchi ñayuu yā. ³¹Núu súcuan te xeēn ndasí cúu jeē quívi ñayuu ini ndaha Yaā Dios, Yaā técu, jeē ndútahū i siquī cuéchi i.

³²Te na núcūhun ni rō ndese ni cuu ichi yátá, nde náa sá ní quejée ró caca ró jíin luz yā, te ni cajendeyí ni rō ni candoho ró tñjñi jnūndóho xeēn.

³³Chi sava ró ní cacahān neé i nuū ró te ni castóho i róhó ní cajito ñayuu. Te sava ga rō ni cajēhe ró jnūhun cuiñī ró jíin ñáyuu ni candoho súcuan. ³⁴Chi ni cacundáhú ni rō ñayuu ní cahiin vecāa jeē siquī yā, te ni cacusiñi ni rō vēsú ni caquende ñayuu ndajniñu ró. Chi ni casáha ró cuenta jeē ndé andiví cánevāha ró ñin tahū jeē váha ndasí gá jeē coo níf cáni. ³⁵Núu súcuan te ma siaā rō jnūhun jeē ní candíje ndije ró jée váha ni yā, chi cuehē ndasí táhū nihin rō siquī ún. ³⁶Chi cánuú jée cuándeyí ni rō návāha sáha ró jée nújnahān ni Yaā Dios, te nihin rō jeē ní jéjnūhun ya. ³⁷Chi cáhān tutu ii:

ñin núnúu-ni te ndee Yaā ndiji,
te ma cucuéé yá.

³⁸Te ñayuu jeē ní ndahva rí cuéchi i, cotecu i jeē candíje i jeē sáha ri jehē i.

Te núu na cáca yátá i, te ma cúsiñ ni rí jíin i.

Achí Yaā Dios. ³⁹Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácañdije yó jée nihín tahū yō cotecu anuá yō.

Siquī jñūhun cándije

11 Te jeē candije yó, suu cúu jeē cúndaā ndije ni yō jeē nihín yō tāca jée ñūhun ni yō, jíin jée jíiní vāha yó jée iyó ndije tāca jée tu cájito yó núu vijna. ²Te ñayuu jenahán chi ni jejnúhún yá i siquī jeē súcuu ni cacandije nihin i.

³Siquī jeē candije yó cúu jeē jécūhun ni yō jeē ni sáha Yaā Dios ñayiví jíin jnúhun ni cahān-ni ya. Te jíin poder Yaā Dios jeē tu jíto yó núu, ni jecōo tāca jée jíto yó núu.

⁴Ni candije Abel jeē sáha ya jehē de, te jeē yúcuu ní socō de jeē vāha ga nuū Yaā Dios vēsú Caín. Te jeē yúcuu ní jejnúhún yá jeē iyó ndáā de, chi ni jetáhú yá jeē ni sócō de quití nuū yā. Te vēsú ni jihī de, te cáhán gā ejemplo de jíin yó nde vijna, chi ni candije ndaā de.

⁵Ni candije Enoc jeē sáha ya jehē de, te jeē yúcuu ní naquihin ya de cuahān de andiví, te tu ní jíhí de. Te tu ní cánanihín ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusí ni yā jíin táca jée ni sáha de.

⁶Te núu tu cándije yó jée sáha ya jehē yō, te tú na modo cusí ni Yaā Dios jíin yó. Chi ñayuu jeē cuní quívicoo ndaha ya, cánuú jée candije ndaā i jeē iyó yá jíin jée cuáha ya tahū nuū ñayuu jeē nducú i candije i ya.

⁷Te Noé ni candije de jeē sáha Yaā Dios jehē de, ná ni castūhun yá nuū

de jeē coo jñúndóho jeē ná tu coto de jeē coo. Te jeē yúcuu ní jendetū de ni sáha de barco cáhnu jeē naní arca, návāha cácu de jíin níí vehe de. Te jeē súcuu ni candije de, te ni cane cuēchi siquī ñayuu jeē tu ní cándije i ya. Te ni ndahva yā cuēchi de siquī jeē ní candije de jeē sáha ya jehē de.

⁸Te Abraham ni candije de jeē sáha ya jehē de, te jeē yúcuu ní jetáhú de ná ni cahān yā jíin de jeē quihín de iin lugar nuū cuáha ya cuu tahū de. Te ni quenda de cuahān de, vēsú tu jíiní de ndé nuū quihín de. ⁹Ni candije de jeē sáha ya jehē de, te jeē yúcuu ní condee tatú de nuū ñūhun jeē ni jéjñūhun ya jeē cuáha ya nuū de. Te ni condee de vehe ñíi, te suni súcuu Isaac jíin Jacob, chi sēhe de ún suni inuú níhín tahū i jíin de jeē ni jéjñūhun ya. ¹⁰Chi ni ñūhun ni de condee de máá ñuu andiví jée iyó cutú cimientu, te máá Yaā Dios ni jequin yā ni sama ya ñuu ún.

¹¹Te suni ni candije máá Sara jeē sáha ya jehē ña, te jeē yúcuu ní nihín ña fuerza jeē ní jecūhun sēhe ña. Chi nde ná ni yāha ndasí cuíyā ña, te ni cacu iin sēhe yíí ña, chi ni candije ña jeē squícu Yaā Dios jeē ni jéjñūhun ya. ¹²Te súcuu ni cuu jeē ní táhū cuehē ñayuu ni sáha iin-ni Abraham, vēsú je jéhnu ndasí de. Te yucūn de ni nducuehē ndasí, nájnūhun quími andiví, jíin nííti yumar, jeē ma cúu cuití cahu yó.

¹³Te tāca tée cándije un, ní cajihí de. Te vēsú tu ní cájito de jeē ni jéjñūhun ya, te ni cajini vāha de jeē cóo, te ni cacusí ni de jeē cóto de inga tiempo. Te súcuu ni cacahān

de jeē ñáyuu ñuu jicá ñáyuu tatú cácuu de ini ñayīvi yáha. ¹⁴Te tāca tēe jeē cahán súcuan, chi stéén cají de jeē nducú de ñin ñuu jeē cúu andiví núu cúu ñuu maá de.

¹⁵Chi núu jeē cánacani ni de siquī ñūū nuū ní quendacoo de, te íyó modo jeē nándicó cóo de te núu jeē cáculi de núu. ¹⁶Te tuú chi ni cacuu ndasí ni de coyūcú de inga ñuu váha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnáhan de, chi je ni sátúhva ya ñin ñuu nuū cóyūcú de.

¹⁷Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni íyo tūhva de jeē socó de sēhe de un jéē mañúhún ni i nuū de, vēsú ni nihīn de jnūhun jeē ni jéjnūhun ya suhva siquī i: ¹⁸Isaac cúu tēe jeē squejéé rí yucūn rō quihīn, achí jnūhun ni jejnūhun ya. ¹⁹Te ni sáha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihī i te ni natecu i nuū de, chi ni jesi-ni ya jeē ma cáhni de i.

²⁰Ni candíje Isaac jeē sáha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji. ²¹Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú sēhe yíí José. Te yítuu de vara de, ni chiñúhún de Yaā Dios. ²²Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, ñin quivī quendacoo i nación Egipto. Te ni ndacu de jniñu jeē chíndūji i yiqui de ñuu nuū quívicoo i.

²³Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i unī yoō. Chi ni cajito de jeē lúu cáa i, te tu ní cáyūhú de siquī acta jeē ni sáha rey jeē na cúu tāca súchi yíí. ²⁴Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhí rey Egipto. ²⁵Chi sa ni cuu ni de ndoho de jíin táca jnáhan de ñayuu Yaā Dios, nasūu jéé cusīi ni de jecu-ni tiempo jíin cuéchi. ²⁶Chi ni sáha de cuenta jeē núu cahān neé ñayuu siquī de jeē siquí Cristo, te yúcuan sáha jeē cucá ndasí gá de ndíhi jeē ndíso jnūhun Yaā Dios, vēsú jeē nihīn de ndíhi ndajniñu cúca íyó nación Egipto. Chi ni ñuhun ni de jeē cuáha ya tahū de. ²⁷Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni ñin nihīn de siquī jniñu sáha de, chi ni sáha de cuenta jeē je jito de nuū Yaā jeē tu cúu coto yó núu vijna.

²⁸Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñī tī yehyí i, návāha núu na quíji ndajéhé jeē cáhni yā tāca sēhe nuú ñáyuu Egipto, te ma cáhni yā sēhe nuú ñáyuu Israel. ²⁹Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núu, te ni nandihyū-ni ndute siquī de ni cajihí de.

³⁰Ni cacandíje soldado jeē sāha ya jehē de, te jeē yúcuan ní cotúú jeē ní condúú ndihyú ñuu Jericó, ná ni cajicó ndúú de uxā quivī.

³¹Te Rahab, vēsú ñahan tǐjni ni ni cuu ña, te ni candíje ña jeē sāha ya jehē ña. Te ni chindéé ñáhán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuan tu ní jíhí ña jíin ñáyuu nihni ni ñuu ña ún.

³²¿Te ndé jnúhun ga cahān rī núu súcuan? Chi tuá na tiempo jeē nácani ga rī jnúhun Gedeón jíin Barac jíin Sansón jíin Jefté jíin David jíin Samuel jíin táca tēe ni canacani jnúhun ya nde jenahán.

³³Ni cacandíje de jeē sāha ya jehē de jíjnánhan de, te jeē yúcuan ní cacundeyí de ni canajni de táca ñuu náhnu, te vāha ni candacu de jniñu nuū, te ni chindéé ñáhán yá de nájñuhun ni jejnúhun ya. Te nuū sava de ni jesi Yaā Dios yuhu ndícaha jeē tu ní cáyeji tī de. ³⁴Te sava de tu ní cáyú de sāha ñuhún jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihín ni de náa tuá fuerza de núú, te ndacuī teyí ní íyo de nuū guerra, te ni cacundeyí de siquī soldado táca ñuu jicá jéē jito uhū ún de. ³⁵Te sava ñahan ni natecu sēhe ña jeē ni jíhí i.

Te sava ga ñayuu chi sa suhva ni candoho xeēn i nde ni cajihī i. Te tu ní cájēhe i jnúhun jeē siaá i jnúhun ya te cācu i, chi ni catee ni i jeē natecu i coyūcu vāha ga i andiví.

³⁶Te sava ga i ni casácata ñayuu nuū i, te ni cacani ñayuu i, te nde ni caconuhnī cadena i ni cahiin i vecāa. ³⁷Te ni cajēhe yuū xinī i, te

ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ñii lánchi máá ñii ndíxuhú ní cañuhun i. Ni candoho ndáhú i, ni cajito i jnúndóho, ni castóho ñayuu i. ³⁸Vāha ndasí ñáyuu ni cacuu i jeē tú cuiti ñayuu ñayivi súcuan, te vēsú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahiin i yaū cava jíin yáú ñuhun. ³⁹Te táca ñáyuu yáha, vēsú ni jejnúhún yá i jeē ní cacandíje nihni i jeē sāha ya jehē i, te tu ní cájito i nuū jeē ni jéjnúhun ya. ⁴⁰Chi ni sátúhva Yaā Dios iin jniñu vāha ga, te suu cúu jeē sāha Cristo jíin yó, návāha iin cáhnu-ni nihin yō tahū yō jíin i, te jeē yúcuan cúu jeē ná tu nihin i ndihni tahū i.

Jeē na cócunuū yō nuū maá iin-ni Jesús

12 Te íyó cuéhē ndasí ñáyuu un jéē ní cacandíje nihni i jeē sāha ya jehē i, te nájñuhun ni jicó ndúú i yóhó, cástéén gā i nuū yō nde vijna jeē suni súcuan na candíje yó. Núu súcuan te suni máá yó, na téjiyo yó táca jéē sajnéñu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. ²Te na cócunuū vāha yó Jesús, Yaā jeē ni scándíje yóhó te sāha ya jeē íje vāha yó jíin jnúhun ya nde jínu ije yó. Chi máá yá ni jendeyí ni yā ni ndoho ya jicā cruz. Te vēsú jnúhun canu cúu jeē súcuan cuu yā, te tu ní sāha ya cuenta. Chi ni ñuhun ni yā jeē sa cusii ndasí ni yā ná ni cuu ni ndoho ya. Yūcuán na te ni cucōo ya

lado váha mesa nuū ndácu Yaā Dios jniñu.

³Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. ⁴Chi ni ná tu ndoho ró jéē ndé cuu rō jeē cánducú ndéyí ró snāā rō cuéchi.

⁵Te sanaa te je ni canaa ni rō jnūhun cáhán tutu iī, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú

Jitoho yō rohó,

te ni ma ndínuu ni rō núu cáhán yā nuū rō.

⁶Chi Jitoho yō snahnú yā ñayuu jeē maní yā jíin,

te jéhe ya castigo tāca jéē

náquihín ya cuu sēhe ya.

Achí tutu. ⁷Núu súcuan te na cuándeyí ni rō jeē snahnú Yaā Dios rohó, chí sáha ya jíin ró nájñūhun sáha tátá jíin séhe. Chí tú na sēhe íyó jéē tu snahnú tatá i. ⁸Te núu ma snahnú yā rohó, nájñūhun ndóho tāca séhe, núu súcuan te nájñūhun sēhe ndáhú cácuu ró, nasūu séhe ndije ya. ⁹Te tátá yō ñayīvi yáha, suni ni snahnú de yóhó, te ni iyo yíñúhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō ní cáni. ¹⁰Te ndaā chí máá de ni casnáhnú de yóhó jecu-ni quivī, ndese ni cuu ni maá de. Te máá yá chí snahnú yā yohó iin modo jeē quéndōo vāha ga yō, návāha coo ndoo yó nájñūhun íyó ndoo máá yá. ¹¹Te ndaā chí tu cácusīi ni yō maá hora jeē ndóho yó castigo, chí sa cúcuíhyá ni yō. Te cúcuéé gá te cuni yō jeē ní quéndōo

ndaā yō te coo ndeyí sīi ni yō jeē ni snahnú yā yohó.

Siquí ñayuu jeē casquéhichi i jnūhun cáhán Yaā Dios

¹²Núu súcuan te ma cóo ró nájñūhun tēe ni cuíta íi ndaha te quísi i xinī yití, chí sa ndacuī na sáha ró máá ró nuū jnúndóho. ¹³Te sáha ró ichi ndóo caca ndaā rō, návāha nduvāha róhó jéē tu fuerza ini, jeē cácuu ró nájñūhun tēe chácua jeē tu cúu caca vāha.

¹⁴Te na cóndihví ni rō jeē condee maní rō jíin táca ñayuu, jíin jéē cóo ndoo coo iī rō nuū yā. Chí ma cúu coto ni iin ñayuu nuū maá Jitoho yō te núu tu íyó ndoo i. ¹⁵Te coto má cáca yátá ni iin ró te scuíta ró jnūhun jeē sáha Yaā Dios jeē váha róhó, návāha tú cuu ró nájñūhun iin yucú uvuá jeē stívi te sáha daño jíin cuéhē ñayuu. ¹⁶Te ni iin ró ma cáca jnéni. Te ni ma cóo jéē ni rō nuū Yaā Dios, nájñūhun ni iyo Esaú. Chí máá iin cohō ndeyu ni jicān de nuū ñāni de, ni sama de jíin derecho de jeē cúu de sūchi núu, te súcuan ni xicó de derecho de. ¹⁷Te cájini rō jeē cucuéé gá te ni cuni de jeē na cáhán tátá de jeē váha tahū nihín de, te tu ní cúu, chí tuá ni tánúhún Yaā Dios de. Chí tu ní níhín jniñu jeē ní nacani ni de, vēsú ni nducú ndéyí de te nde ndahyú de.

¹⁸Te róhó jíjnáhan ró tu ní quíjicoo ró núu íyo cúu, nájñūhun íyo ni cuu máá yucu nuū ni jéhe ya ley yā nuū ñayuu Israel. Chí ni cane yáñuhūn yucu Sinaí, te nee lúchi jnúú jito, te quée tachī xeén. ¹⁹Te ni jecu trompeta, te ni cahán Yaā Dios. Te ñayuu jeē ní cajini sōho jeē

cahán yā, ni cacahān ndahú i jeē ma cahán gā yā jíin i. ²⁰Chi tu ní cúndeyí i jíin jnúhun jeē ní ndacu ya jniñu nuū i, chi ni cahān yā: Vēsú iin quiti-ni núu quívi ti yucu yáha, jíni nñuhún cuu tī jíin yúu chí jíin lanza, achí yá. ²¹Te siquī jeē íyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

²²Te vijna róhó jéē cácandíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quívicoo ró. Te ñuu un cúu Jerusalén jeē íyo andíví, nuū cáhiyo tútú cuéhē ndasí mil ndajéhé cáchiñuhún Yaā Dios. ²³Te ni quívicoo ró núu cáyūcu tútú ñayuu cácandíje jeē cácuu sēhe Yaā Dios, jeē íyo lista i andíví. Te ni quívicoo ró núu Yaā Dios, Yaā sándaā jniñu ndíhi ñayuu, jíin núu cáhiyo ánuá ñayuu vāha jeē jé ni squéndōo ndaā yā i. ²⁴Te suni nuū maá Jesús, Yaā ndíso jniñu siquī contrato jeē ní quívicoo ró. Te yahu ndasí gá jniñu sáha ñiñí yā jeē ni jéti jeē ndáhva cuēchi yó, nasūu níñí Abel jeē ni jíicān cuēchi.

²⁵Núu súcuan te coto má squéhichí rō jnúhun jeē cahán yā jíin ró jijnáhan ró. Chi ñayuu jeē tu ní cájetáhú ná ni cahān yā jíin i ñayívi yáha, tu ní cácaacu i. Te xeēn gā ndoho yóhó te núu ma cuatáhú yó nuū yā jeē cahán yā nde ichi ándíví núu súcuan. ²⁶Te nde saá ní quísi i ñayívi jéē ni cáhān yā. Te vijna chi cáhān yā: ĩn na jínu quísi rí ñayíví, te nasūu máá-ni ñayíví, chí suni táca jéē ĩn andíví, achí yá. ²⁷Te jnúhun yáha jéē cahán, iin

na jínu, chí cúní cahān jeē téjiyo ya táca jéē tu íyó cutú, suu jeē ní cuvāha, návāha na quéndōo jeē cóo cutú níí cáni. ²⁸Núu súcuan te cuāha Yaā Dios iin ñuu nuū yō jeē cóo cutú níí cáni. Te jeē yúcuan, na nácuatáhú yó nuū yā, te na chíñuhún yó yā, te na cóo yíñuhún yó, návāha cusíi ni yā jíin yó. ²⁹Chi Yaā Dios maá yó cúu nájnūhun iin ñuhūn jeē snāā ndíhi jeē neé.

Ndese sáha yó te cusíi ni Yaā Dios

13 Ma jécuiñí rō jijnáhan ró jéē cundáhú ni rō hermano rō cácandíje. ²Conahán ró jeē cánuú cuāha núu ró vehe nuū ñayuu cájica. Chi íyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andíví ní cajēhe núu i vehe.

³Te conahán ró chindéé ñáhán ró ñayuu cáhiin vecāa, chí sáha ró cuenta jeē nájnūhun cáhiin cáhnu ró jíin i vecāa. Te suni nacani ni rō jehē jnáhan ró jéē cándoho i sáha ñayuu, chí núu súcuan coo jíin máá ró te suni ndoho ró.

⁴Coo yíñuhún ró síquī jnúhun quíjínáhan ñayuu, te ma cosíquí ndéé jnáhan ró. Chí máá Yaā Dios sándaā yā cuēchi ñayuu tíjni ni jíin ñayuu casíquí ndéé jnáhan.

⁵Te ma ndíyo ni rō xūhún, chí na cóo síi ni rō jíin jéē cánevāha ró. Chí máá yá ni cahān: Ma siaá cuíti rí rohó, ni ma stóo cuíti rí rohó, achí yá. ⁶Núu súcuan te ma ĩn jeē cáni ni yō, chí cuu cahān yō:

Máá Jítóho rí chindéé ñáhán yá ruhū,
te ma yūhu rí núu na vé cúní ñayuu sáha i jíin rí.

Achi yō.

⁷Te na núcūhun ni rō tācá pastor rō, jeē ní castéén de jnūhun Yaā Dios nuū rō. Te sāha vāha ro cuenta ndese ni nihīn jníñu jeē ní casáha de, te na ndácu ró de jeē ní cacandíje de jeē sāha ya jehē de.

⁸Te Jesucristo chi ñn-ni cáa ya ichi yátá jíin vijna jíin níí cáni.

⁹Núu súcuan te ma cuáha ró jnūhun candíje ró táca jnūhun jeē síin cáhán jeē tu quíjnáhan jíin jnūhun máá yá. Chi íyó váha jeē na íje ánuá yō sāha jnūhun jeē váha ni yā jíin yó. Te tu jíni nūhún yó jnūhun jeē tajnúni síquī jeē yéji yō, chi tu níhín jníñu cuítí jíin ñáyuu cáhiin jíin.

¹⁰Te máá yó chi cánevāha yó ñn jeē ni sócō maá jéhē yō, cúu Cristo. Te tāca sūtū jeē cásocō gā de modo jeē cahán ley jenahán, tú na vé nihín de nuū yā jeē ni sócō yā maá yá. ¹¹Te sutū cujéhnū ga, ná ni socō de ñíñi tācá quití ini cuarto íi gā jeē síquī cuéchi, te yiqui cúñu tí ni cajehmu de ichi yátá ñuu. ¹²Te suni súcuan ni ndoho máá Jesús ichi yátá ñuu, návāha jíin níñi maá yá te sándoo ya ñayuu. ¹³Núu súcuan te ma cóo inuú gá ni yō jíin ñáyuu tu cacandíje, chi nájnūhun quihīn yō jíin yá ichi yátá ñuu, te na ndóho yó jíin yá jeē sácatá i. ¹⁴Chi ñayívi yáha tu íyó ñuu nuū coo yó níí cáni, chi sa cánducú yó máá ñuu nuū cóyūcu yó quívi quíji. ¹⁵Núu súcuan te jeē jíin Jesucristo te níni na cáhán yō jeē yóhoyo cújéhnū Yaā Dios, chi suu cúu nájnūhun ñn jeē socō yō nuū yā, suu jeē nácuatáhú yó nuū yā. ¹⁶Te ma náá ni rō sāha vāha ró núu jnáhan ró, te cuāha ró

jeē cúmanī nuū i. Chi nájnūhun ñn jeē cásocō ró nuū Yaā Dios cúu tāca jéé yáha, te cúsiñi ni yā jíin.

¹⁷Te cuandije ró núu tēe cácuu pastor rō, te cuandetū ró nuū de. Chi cándito de róhó jéé quéndōo vāha ánuá rō, chi cájini de jeē cánuú nacuāha de cuenta nuū yā. Te condíhvī ni rō sāha vāha ró, návāha cusíñi ni de síquī rō te ma cucuíhyá ni de síquī rō. Chi núu tu súcuan te ma cóo jeē váha jíin ró.

¹⁸Te cacán tahu rō jehē rī jijnáhan ri. Chi vāha íyó ni anuá rī jeē tú na cuéchi ri. Chi cáconi rī caca yíñhún rí jíin táca jniñu. ¹⁹Te suni cáhán ndahú rí jíin ró jeē cacán tahu ndasí ró jehē maá rí, návāha cuāha ya jnūhun jeē yachī gā cuajeē tucu ri nuū rō.

Bendición jíin saludo jeē sándíhī

²⁰Te máá Yaā jeē jéhe jnūhun ndeyí síñi ni nuū yō, ni nastécu yā Jitoho yō Jesucristo mēhñu ndíyī. Te Jesús cúu pastor cujéhnū jeē ndíto ñayuu cácuu nájnūhun lanchi ya. Chi jíin níñi yā ni sácutú yá contrato jeé yá jeē coo níí cáni. ²¹Te ñūhun ni rī jeē Yaā Dios na sāha ya jeē íje ni rō jijnáhan ró, návāha cuu sāha ró táca jniñu váha ndese núnahan ni yā. Te ñūhun ni rī jeē jíin fuerza Jesucristo jeē ndeé yá ini yō, na sāha Yaā Dios jeē cuu yó ñáyuu cúsiñi ni yā jíin. Te na cáhán yō jeē yóhoyo luu cújéhnū ya níí cáni. Amén.

²²Hermano jijnáhan ró, cáhán ndahú rí jíin ró jeē cone cáhnu ni rō jeē stíhvī ni rī rohó jíin jecu-ni jnūhun ni tee rī nuū carta yáha.

²³Te cástūhun rí jeē hermano yō

Timoteo, je ni quenda de vecāa. Te nūu yachī quiji de yāhá, te cuajecoo ndindúú rí nuū rō coto jnāhan yó.

²⁴Te cahān rō jín táca tée cácuu pastor rō jín táca hermano cácandíje jeē sándeýí ni de, áchí

rí. Te ñayuu Italia suni cácahān i jeē sándeýí ni rō.

²⁵Te ñúhun ni rí jeē na sáha ga Yaā Dios jeē váha róhó jínáhan ró. Súcuan na cóo. Amén.